

四庫全書

集部

欽定四庫全書

文莊集卷二十六

宋 夏竦 撰

碑銘

傳法院碑銘

太宗至仁應道神功聖德文武睿烈大明廣孝皇帝以
太平興國七年六月建傳法院于太平興國寺今上體
天道法仁明孝德皇帝以景祐二年六月特詔史官追
頌先烈史臣某拜手颺言曰唐氏中微五代多故三辰

昏侵九服煨燼虎爭龍戰靡沸雲擾我國家題五精之
期起千歲之統祛天地之否隔極夷夏之塗炭翦寇劇
以靖搖亂誅僭劇以遏橫驚太宗皇帝張天弧順斗極
驅除鄰敵駕馭髦傑制禮樂於已壞振文武於將墜奉
藝祖以造大業由太弟以纂鴻緒歸馬論道投干講藝
覆露所及轍迹所到罔不闢皇衢剡霸軌一文軫齊量
衡者焉泊乎六幕謐寧中宸閒晏披壺簡訪幽經觀天
人之交探神明之奧補綴漏遺講求希濶朝夕之議必

稽於典冊小大之政咸本乎根柢嘗謂佛法之至也百
王不易歷世彌盛中原之區宇絕域之種落戶諷其書
家圖其像一睇宰堵一嗅簷蔔或因受以悟法或睹相
以趣善感照以應羣動廣大以攝萬有裨德教省威戮
其來尚矣先朝乾德中臨遣僧行勤等一百五十有七
人各賜裝錢訪經西域今繼有還者嗟其翻譯之廢載
祀二百非國家削平多壘奄宅四海通道夷貉暨聲蔥
雪大事因緣疇能復之會廊時守吏王龜從上中天竺

印度僧法天梵學比丘法進所譯經又北天竺三歲天
息災與其受具母弟施護各持梵夾來獻符帝雅意天
實啟之乃遣內侍鄭守鈞肇營茲館賜息災法天等宣
譯命光祿卿湯悅等潤文法進等筆受綴文義學苾芻
慧達等證義高品王文壽等監譯由是憲前軌稽秘藏
依金剛界訖種子壇書字源布聖位三成藻飾四事莊
嚴三歲主譯於壇北梵僧證梵義證梵文義學僧證義
刊定華字于左右潤文東南以資筆削監譯西南以肅

儀律新經既成制蹕臨幸賚物有品詔賜金額歲給殮
錢一億六十萬度僧十有一人翻譯之制大備於茲御
製三藏聖教序以冠經首息災賜名法賢又詔擇京寺
童子得惟淨等五十人令肄梵學每大電紀辰貝多啟
譯經成奏御召對賜坐進見甚寵觀者榮之真廟紹文
鴻徽累盛舞羽而清河右再駕而羈幕北鑾旗駐於茲
館篚幣班於法席洎乎勒園封禪梁趾上儀交舉盛節
咸備擁九清之嘉祐訪三空之真諦祇適先訓布昭睿

藻作聖教序以賜之又詔參知政事趙安仁等并所降制詔賜名大中祥符法寶錄復以宰臣丁謂王欽若充使以寵重焉聖上慎徽祖服光啟宗範長養容覆極兩儀之大德睿哲廣運總列辟之能事盡美乎萬幾宣精乎三教悟然燈之授記當彌勒之囑累以無上之知覺建大中之教化述三寶贊以冠歲錄衆聖歡蹈羣生依怙雨花芬都金光照爛恩深歸救之本理極名言之表無量功德非思議之可及也自興國壬午距今乙亥五

十四載寵靈積累妙因殊勝有若今右僕射同中書門
下平章事呂夷簡以師臣上衮博達空理奉制兼使今
參知政事尚書吏部侍郎宋綬以宏材碩德了悟真際
被詔潤文有若故樞密使同中書門下平章事王曙參
知政事張洎趙安仁樞密副使楊礪翰林學士承旨晁
迥李維翰林學士朱昂梁周翰楊億皆以學通儒釋繼
司譯潤上哲清流盡在茲矣翻宣表率則有三藏五人
皆賜朝散階累遷試光祿卿始法賢次法天次施護並

刹帝利氏深窮秘密博通華竺功成順化卹禮尤異又次法護比天竺僑尸迦氏始隸毗尼聿修禪誦先朝以其至自西遐該明法要令嗣譯度次曰惟淨故吳王李煜之猶子七歲依師選習梵業真皇以其不游西度精曉貝文特命主譯天聖中法護請還身毒惟淨求往闕塞累表不允今皆際會昌期宣隆教典者焉其監譯內侍則自文壽至今內藏庫內常侍陳文一御藥院內供奉官閻士良印經院內內高品朱若水十有七人皆

簡擢恭恪以幹院事其筆受綴文證義等僧則自法進
至今文一法凝鑒深慧濤潛政清漏善初義崇慧素存
行及梵學僧文涉道隆慧燈七十有九人皆妙擇行業
以塞朝選其貢經五印度僧則自法軍至法稱八十人
取經還華僧則自辭潮至棲祕一百三十有八人皆克
遂至願贊此大緣寵賚之數咸有差次其貢獻并內出
梵經無慮一千四百二十八夾祕之院閣譯成經論凡
五百六十四卷續於藏室娑婆之界以語言文字作佛

事

原本缺

體貌丞相寵數尊異其誕辰翻譯瑞場啟罷並

命兩府衡弼傳香賜會著為永式夷簡等進詩稱謝有
詔刊石譯館之榮於斯為盛說者云譯者釋也交釋華
梵對傳句讀辨佉樓之筆簡韋陀之辭本政因以建之
糅雜句以文之廣陰入之津梁續寢寘之燈炬宣我象
教功孰大焉然而擬於法者空幾於真者靜染空尚垢
知靜猶障若夫遺照覺度禪定應現無方圓明具足者
豈有髣髴於其間也哉但以千覺度人始自言語八歲

垂教必假文翰雙林示寂驚嶺罷談五百年中皆稱正
法三十四字廣衍右行充溢諸天靡迤東土非傳釋無
以達華夏捨潤色無以足言志鑿五蘊之牖破三毒之
網塞顛倒之塗決苦惱之海俾衆生竭愛流灌燬宅味
甘露以清涼大士悟始覺證法身護神通而遊戲其六
度之本源乎萬行之因地乎宜固諦方言練橫字審緣
起正思惟貫穿宗極以了密義涉獵蒼雅以定華文備
而不繁直而不畧訶四病之微細拂二見之邪執灑之

海墨則諸佛下觀詠以潮音則百靈潛聽使廣劫之下
知朝家崇建之美歎聖上尊嚮之仁不其偉歟臣早遊
史閣嘗預譯場終以鈍根求補外職地如亭厯有生之
累猶多筆若須彌衆妙之門難盡上勤哀舊物俾圖懿
鑠謹奉宸旨靡敢固辭議者以為聖上之建斯銘也昭
貽厥之謀周文之追孝也尚記事之美陶唐之有文也
光大度門能仁之悲心也守護正法有帝之鴻誓也宣
是四美垂厥無窮乎龍天降格神祇歎譽永錫百祿大

庇中區皇哉煥乎謹為銘曰西方聖人萬化幽贊兆啟
於周法至於漢森沉天祿古經肇煥竄篠甘泉金人聳
觀機緣合應夢寤通靈騰蘭東入愔景西迎氎像可傳
繪事初形具偈難解譯法肇興魏晉洎唐正閏十九變
梵成華翻傳代有篆隸兼該典墳旁究八備咸精三難
盡剖正元以降國步多艱戎笳沸路盜戟橫關悉曇罔
學雷嶺誰攀法器幾墮慧命將殫明明上穹啟我有宋
盡殛殘暴並蘇愁痛神武拓迹聖人垂統四貉同文五

天底貢皇靈有赫法寶增光精廬再考譯席重張半滿
交顯疑僞兼詳六義垂範萬頌裁章竺典歲臻華經日
續液金貴字彫瓊麗軸思文祖禰尊善導俗克昌厥後
介爾景福皇帝孝思對越無極碑頌休烈載刊金石鋪
昭上乘博濟含識惟皇壽考時萬時億

慈孝寺銘

并序

維天聖四載冬十二月洛苑副使入內內侍省押班江
德明被旨治故燕國英惠長公主第為佛寺資福於真

宗文明武定章聖元孝皇帝始聖上以皇太后濬發鴻
誓祇迪淨因圖創美名永昭慈訓三事之臣相與進曰
陛下以聰哲廣運承燕翼之謀太后以寬仁勤儉膺顧
託之重垂簾訪對齋居聽政雨露均澤榮悴畢霑日月
並明忠邪洞判陽郊再卜歲歷五頒六幕晏清百嘉楙
育此太后至慈以佑嗣聖景貺博臨陛下至孝以事母
儀黎苗歡服在昔名寺方冊具焉或以紀年或以盛德
今願以慈孝為名庶稱道於無窮暉映於前代有制可

之仍命近臣銘於樂石臣聞東漢已還有天下者繼體承基尊祖親禰黃流玉璫觀盟之享嚴高燎清壇外宥之容備屬象餘烈顧慕遺恩奉先之典有終欲報之哀無極或以佛國追福或以釋像薦靈旁行不流厥惟舊矣唐氏中微五代短祚寇劇搖亂羣雄紛擾載祀踰於二百歷世幾乎三十文輝昏侵山川圯裂空廬生荆棘郭郭成煨塵大塊之載欲空下民之命垂盡我國家天人合應祖宗重光並翦鯨鯢再造畿夏勝殘去殺解百

王之弊紐題期立象擁五精之王氣憲洪範順乾則置
國以建永圖剋霸軌拓皇衢納民以遵大道功有震疊
燁燿格天光表而太山之高未增德有旁魄曼羨蒸雲
潤海而梁父之基未附上帝儲蕃祉而有待先聖膺寶
命而惟新其宅藩房踐儲邸則三鷄問寢四時省膳周
文之孝德也尹正京轂寵綏都畿有虞之厯試也其步
天階御神器則攸縱多能宣精道藝陶唐之文思也躬
案六師外攘夷狄成湯之聖武也大哉以日躋之美承

天賛之業仁經之義緯之根本於道德粉飾乎禮樂信
以來遠忿驚之兵寢虛以受人鯁亮之臣進萬景以之
昭晰元化以之網緼包舉大寧參侔遂始故能延颺駕
席蘿圖萃坤珍輯天瑞紀官立制克稱乎神物升中降
禪不顯於上儀鄒丘頌祇曲里尊道秩無文以拜貺篆
名山而紀迹均大賚賜明宥復太素宣至和予黎庶之
恩豐賓萬靈之禮洽方將祓靖館齋大庭而思帝所以
甚歡厭天下之為累徹琴瑟而弗憚倦輿馬而罷游聖

人入侍興居冠帶不褫太后親嘗藥石夙夜必躬靡愛
牲牷徧走羣望載罄圭璧並植三壇屑瓊藥而無功諱
玉靈而罔效於是祈竺乾之祕教捨沁水之名園行冀
有瘳即程庶役靡獲夢齡之感終稽彤日之報弓遺髯
斷荆山之鼎空成鐘睥酒清鈞天之遊不返宇宙慘怛
人神震動六宮攀號萬國縞素皇帝起初載臨宸極章
明百度履德包元以儀形乎風烈皇太后恭遺制保重
熙平決萬樞博照兼覽以對越乎威神以為能類帝者

聖人善饗親者孝子乃緣先朝之意寢講昭事之文以
真皇之受元符膺秘記層宙之顧懷也始嚴安聖之殿
於玉清之廷奉諄誨廸璿源六羽之監觀也繼作奉真
之殿於靈景之館又以洛師古壤藝祖降靈有應天之
院睢陽奧區王業資始有鴻慶之宮四範睟容並安寶
宇盡漢祖龍顏之妙增開元玉石之華皆衣冠是游旒
宸如在薦櫻獻鮪馳傳相望濡露履霜因時增愴又以
為禴祀極乎禮異幽贊之宜哀戚竭乎情無名助之禮

乃復疇近職命有司申述緒言繼成曩志即鳳臺之餘

趾建鹿苑之精廬因舊垣而不廣慮民居也鳩庶工而

惟簡形人力也

原本闕三字

祇植之園設像兼顧成之廟巖

洞隱飾疑堂邑之山林讚唄傳聞變平陽之歌舞回廊

四注飛觀相臨落斯干之雅章成春秋之遂事以五年

冬十月詔擇練僧三十以奉重修置淨人二十有五以

給灑掃設官守之局俾德明以董之議尊奉之制命太

常以參之先置禁中肖像文考是月壬申乃率邇臣戒

宗室導自天章之閣至於會慶之殿紫幄奏香空歌達旦翌日羣后晨謁百靈備從申命上公奉安於寺之崇真殿緇黃先道儀衛清路幡華旗旆左右相見鍾磬笙簧前後間作帷帟設次簪紱在廷太史候辰攸司錯事言瞻殿榜出於宸翰飛毫舉鳳拂素騰龍孝德聖能並煥茲日甲戌上運法駕率公卿以奉馨薦越翌日太后御調輿總嬪侍以獻令芳都人隘塗軒車擊轂或鼓舞蹈德或感泣懷恩望帝卿之雲慘淒共色聽魚山之梵

讚歎相趨先帝付受之道光矣後聖恭事之禮至矣書
所云克篤前烈詩所云聿追來孝者也史官奉詔謹為
銘曰有宋赫赫兩宮明明慈昭神育孝總天經思文真
皇悲哀罔極魯館方虛給園斯闢斗城北望廣路東披
采楹叢倚紺瓦翬飛寶網羅空金繩表道滿月光明青
蓮相好有殿中峙實奉先朝彫雲麗幄綺棟陵歌隆準
如生清輝若在祇薦馨香疑聞謦欬供帳咸具服御畢
陳履綦雖遠手澤猶新閒館旁連藻扃相屬庭有寓龍

山多疊玉巖衛岑寂靈游往來雨華紛馥飈馭徘徊日
監孝思永錫純嘏時萬斯年在宥天下

文莊集卷二十六

欽定四庫全書

文莊集卷二十七

宋 夏竦 撰

碑銘

大安塔碑銘

奉勅撰

有宋封禪後十祀建大安塔於左街護國禪院從尼廣
慧大師妙善之請也今上寶元體天法道欽明聰武聖
神孝德皇帝在宥之十有七載詔史臣書其事從尼慈
懿福慧大師道堅之請也妙善長沙人姓胡字希聖母

既孕不茹葷妙善勝衣志求事佛馬氏之亂略為姬侍
嘗被毀逢怒憂在叵測默誦普門名稱舍利見於額中
馬氏異而禮之國初宣徽使兼樞密副使李處耘南定
湘川得之郡邸嘗以素誓未伸斷穀謝病夢異人曰我
文殊也汝第食勝緣近矣明年處耘捐館遂依洛陽天
女寺剃髮受具往來兩京高行著聞太宗皇帝以椒塗
之舊錫以懿名被之華服大姓哀溥捨第起剎賜額妙
覺禪院令妙善主之自是肅禪儀練律學給瑜珈之會

演華嚴之說五陟岱山一汎泗水皆中貴護送傳舍供
擬皇帝巡狩河朔刺血上疏璽書褒嘆是時萬年中參
恩愛異衆宸闈進見禮數踰等贈中書令忠武公李繼
隆每以保阿尊事尤謹洎元符降格法御上封妙善即
朝日之郊卜布金之地諷甘露法品祈東禪靈祐帝意
嘉之賜名護國天禧元年湘東遂谷有鉅石重累數十
百丈屹若浮圖昔隱今見詔遣使案視建寺度僧以旌
其異妙善志往瞻禮有大弟子道堅以師臘既高衡陽

云遠懇留不已先事以聞翌日妙善請告南遊真宗曰
汝老矣何遽遠適如來性海隨處現前儻有至誠皆可
供養妙善遂求建今塔特詔許之會江寧府長干塔成
繪圖來上促召妙善於護國將賜之道堅在妙覺地近
先至訪對稱旨受圖以歸首事創規實始於此由是涓
日置果肇基寶梵冶金磐石作於地宮將秘莊獻明肅
太后所賜馱都速妙善襄得佛骨會妙善示滅盡以塔
事囑累道堅妙善享年七十有六尼夏五十有五宮闈

震嗟賻贈加品建坊立剎賜額寶勝以道堅兼主之道
堅盡禮荅敕入謝局禁且陳妙善遺誓云此塔今世不
成來生願就先帝惻然賜以潛邸珍玩三千萬直仍命
內侍分董其役明年春法堅製金觀寶函納前舍利等
入奉於內道場贊唄三夕兩街威儀導自滋福殿帝薦
香以送之李商協吉藏於石室五年繼賜乘輿副物貨
錙萬緡以供餘費乾興初又以塔心殿棟須合抱修幹
既選未獲貫於皇帝上方以天下為公且重違其請莊

太后時為皇太妃乃以奩金五百萬輸於內府市材以施之天聖改元內出明德太后寶器價二百六十萬洎莊獻服用千餘萬付之公帑易金銅鑄輪蓋以施之美哉四門九級岌業天中十盤八繩晃曜雲際道堅又以巧塲雖畢丹采剝剝未完徧募檀信獲緡一萬八百洎法堅稟給餘貲三百二十萬以償其工上繼志有嚴奉先惟孝宅心凝覺追福太宮由二級而上命奉安禰廟至宣祖皇帝四室神御並列環衛拱侍左右自餘緣塔

功德未具者皆省服御成之由是賢劫之象薩埵之容
五佐星緯八部人天分次峻層罔不咸備七年功畢詔
賜茲額金榜始嚴廟輯臨視談贊五尼賚紫方袍并賜
近院官舍九十區傲直充供明道二載上給白金五十
鎰俾營獻殿先有陳元虔捨僧伽像張延澤施羅漢像
頗極精巧道堅復建二殿夾峙於塔以奉之又營諷法
華孔雀經二殿以次之景祐中上賜錢千萬創二樓於
塔前右安特旨所賜龍藏作香輪以轉千函左挂莊惠

所捨鐘樹彫格以維九乳其斜廊壁繪羅漢迦文像亦
莊惠之施粵自營創逮夫圓成則有宗藩施三門洎無
量壽像鄧國貴主施報身像尚宮武氏施法身像朱氏
施藥師像何氏施下生像晉國夫人張氏施工繪獻殿
壁潁川郡君韓氏捨圓於西戈水杜航捨地於東及其
季尚繼獻金錄壽春王文獻緡錢義學比丘端琛指教
相文字比丘惟儼著塔錄吳門應德興為匠石皆道堅
願力所召共周能事者也厥初妙善嘗夢塔相止於雙

足談者以為上足善繼之祥也塔成忽一日遠望如失
靈祇環遠之異也道堅故通事舍人杜志儒之女母明
德從父姨再適故殿前指揮使武成軍節度楊信封隴
西郡夫人道堅生九歲即齋素十有一求捨家興國八
年剃度得戒明年賜紫伽梨十有六授慈懿師名嗣掌
妙覺月給俸料三時賜衣歲度僧薦紫各二隴西夫人
隨子剃染暮月歸寂道堅天機警悟資性嚴整有大丈
夫風槩嘗誦法華千卷華嚴首楞淨名圓覺皆數百過

記憶教藏該通大義塔之規模盡出智匠總三院之務
安數百之衆以慈悲攝嗔恚以精通攝懈怠故能念舉
而物應身動而衆隨羣蠢表異纖鱗示應作大因緣終
始圓就明道中詔加福慧之名嘗談經於觀文殿有旨
賜尼衆食料道堅以為出家分行折伏驕慢赴請之飯
猶起諸漏彷徨移晷切辭仰給每院但受月廩作糜米
十斛聞者與之謂其知分夫以柔弱之賦婉嫵之姿其
間具明淑之德習師傳之訓不過佩服詩禮蹈履謙祇

體蘋蘩之柔潔法山河之容潤而已其能斷棄愛染脫
離塵垢以堅固為佛事以勇猛超實際濬發心華坐空
蘊樹者何其偉歟古之后族出入宮掖憑藉聲勢徂伏
恩澤外交王侯旁出姻援不期驕而自速靡羨侈而極
懷載之前聞為鑒來轍者有矣其能委遠光寵杜絕微
望辭榮於宗屬等志於貧賤以喜捨化俗以高潔自持
者抑為難哉宜乎萬乘待遇六宮景慕成支提之上緣
到無生之彼岸者也於戲是塔兀功二十年規平三百

尺高二引有六丈經用一億旁廡佗舍無慮五百楹自
非景祚和平累朝信奉設有大願烏可成邪是知諸佛
慧命其待時而興也夫議者皆以為聖上於是塔大美
者四中出寶幣形民力也日就勝因暢先謨也敦勸於
下使趨善也命書厥勞庸展親也所宜鬼神潛衛海域
延仰永集純嘏施及懷生者焉臣早預翻經嘗更約史
仰被臺札靡敢固辭謹按塔者梵云窣堵坡此云靈廟
在於諸天則藏佛爪髮衣鉢在於西度則記佛降生經

行演說圓寂之所一以表人勝次以生地信三以報重
恩四果之位能超三界故有初級至四級者如來出十
二因緣故極於十有二級焉迦葉滅後婆羅奈王起七
寶塔為作銘記豈非刻石之識抑有初邪或問古今哲
王之導黎庶不專講六藝而參用三乘豈其大抵同歸
於善乎臣嘗試論之夫有生之源本始清淨寂則絕待
於一物感則資始於萬緣至靈無方至虛善應覺者則
圓通罔礙湛寂自然內不立於寸心外無累於羣境不

為世界之所流轉不為幻妄之所變移迷者則奔馳萬
有昏翳五欲習動而不能靜入業而不能捨失本明而不
知沉諸趣而不恨所以能仁愍之出現於世法不廣大
不能包種性喻不善巧不能破根蘊窮理而至命象繫
之旨也率性而達道中庸之意也好生惡殺仁義之均
也防非致和禮樂之則也聖人以為外可以扶世訓佑
生民內可以澡心源還妙本所以崇其塔廟尊其教戒
自東漢以來歷世多矣其間執分別之論起歸嚮之疑

廢之而逾盛毀之而逾信豈非言底乎不誣理冥乎至
當者哉昔有人云百家之鄉一人持戒則十人淳謹百
人和睦夫能行一善則去一惡而息一刑一刑息於家
則百刑措於國以此觀之則斯法之來禪我之治蓋亦
多矣上具大智慧有大威德神道以設教文明以化人
晏坐黼帷鋪觀貝牒信解出於天縱悟入自於生知指
曹溪頓門則言高達摩覽竺乾半字則義中悉曇實玉
毫之化身託金輪而救物未階鋪砌孰望清光而况投

筆端闡屬鞬遠戍據案受簡摩盾操觚但緣外護之仁
少叙重熙之德謹裁二十有四頌以勒銘云

於鑠帝宋氏睿明繼照百度恢大功三歸崇正法長
居憲紫微東郊配蒼震有大除饒女肇營晏坐場九級
締層楹兩朝施寶玩八觚回日月百尋切雲霓七佛儼
金容四聖崇睟表瑑刻具千覺圖繪周萬靈鈎檻蔭璇
題高簷幕珠網龍天乍來去煙霞時蔽虧我聞上帝宮
昔在莊嚴殿八萬窻牖柱衆寶極彫飾局若佛滅後隨

緣崇廟貌設利羅如芥蘇偷婆如果有盤若棗葉有像
若黷麥其福已勝彼無量千百億况惟此聚相密邇於
國城樓觀相飛注康莊四通達宰官引鏡吹公侯聯旆
於都人集袂惟王姬傳車水流景啟清旦行月麗中宵
幡影鋪九衢鈴風聞百里我願瞻仰者應起大衆解悟
此見聞性充滿於十方我願供養者應發菩提心覺此
煩惱燄本是清涼源我願掃除者應生精進力反此塵
勞身徑度禪定業我願旋遠者應作三昧觀轉此顛倒

想頓入清涼慧寂念以為地般若以為基正受為花鬘
解脫為寶篋藏此無價珍非空亦非色遠謝修證垢並
祛照覺蔭水澄滓乃去火盡灰亦飛法縛既解除神通
自遊戲若於權實際猶有一微塵欲求見如來尚隔須
彌聚佛祖秘密印華梵微妙言語默及思維不越於此
義後之登塔者應知建塔因蓋表調御德起發淨信心
掩日不為多聚沙不為少但能復本覺即成無上道朝
家光四葉尊重於寶乘真祖創妙緣鴻禧昌厥後吾皇

授曩記成此殊勝果壽考億萬年永庇大千界

祝文

明慶殿謝雨祝文

皇帝祇嗣慶基恫矜庶彙昨以農時在務膏澤未零仰
罄齋明聿伸祠禱驕陽盡弭羽孽爰銷亟成豐楙之祥
大洽沖和之氣是消良日躬歛殊庭虔奏飛香仰酬真
陰皇帝伏願璿源益濬壽嶽彌高祉福紛綸更茂隆昌
之慶蒼黔安泰永臻富庶之期

祈晴祝文

維天聖四年歲次丙寅六月乙卯朔二十日甲午嗣皇帝臣謹遣推忠協謀同德佐理功臣樞密使武寧軍節度管内觀察處置等使開府儀同三司守司空檢校太師兼侍中充景靈使兼羣牧制置使行徐州大都督府長史上柱國魯國公臣曹利用謹上啟聖祖上靈高道九天司命保生天尊大帝伏以方迴溽暑肇戒青商大田垂豐茂之期積雨有滯淫之懼比修禋薦虔冀靈休

精誠溥伸感應如響

紫微殿祝謝文

皇帝寅威寶命率育懷生昨以膏澤愆時飛螟暴稼精
哀既禱果蠲疾之咸消嘉雨頻霑豐穰之倍異是用
載嚴法御祇欵清都親薦馨香恭酬貺施伏願靈心鑒
佑道蔭延鴻拂石為期遐增於睿算夢魚獻兆常遂於
有年



大莊集卷二十七

欽定四庫全書

集部

文壯集卷

二十六至
三十

詳校官監察御史_臣李陽斌

檢討_臣何思鈞覆勘

謄錄貢生_臣苗序瀟

謄錄監生_臣汪葆

謄錄監生_臣李光緒

欽定四庫全書

文莊集卷二十八

宋 夏竦 撰

祭文

中書祭故太尉尚書令王文貞公文

炎正宣精，昴靈儲粹。載降英賢，允懷明懿。心有常照，材
無定器。沉寂內融，矜嚴外賁。潤色暮訓，藻麗詞豐。周旋
樞近，識茂言忠。爰裨衮職，克亮天功。疇咨熙載，若時登
庸。慮善與謀，協中布畫。靡卹人言，務均王澤。內靖九流，

外清四絡畫像雲臺鏤勲丹冊蘿圖錫祉飈御延禧梁
陰讓德睢壤奉祇朝元景毫薦號真祠交闕祕藏首贊
鴻儀懿彼嘉猷邁茲亨會曠古難偕前良罕對異寵雲
游隆恩澤霈禮絕地尊功高貴倍封踰萬室位冠三階
憂民瘁志體國勞懷辭榮中鉉進秩東臺叩閣斯切出
綍終回游陟上公靖顓司館霜露增憂龍蛇起歎玉塵
停揮瑤琴罷玩疹積膏育身悲夢幻青霞難挹瓊藥無
徵太醫連袂中使盈庭載紆詔蹕深惻皇情拖紳猶對

逝水俄傾痛極殲良哀深撫几制服推恩易名進美宅
兆將安塗芻既備衢巷輟春都城罷市某等早陪伊鼎
獲奉蕭規情條共慘嵩恒方隳徘徊素館顧慕容衣恭
陳宿奠永隔清徽

行狀

故金紫光祿大夫行尚書工部侍郎致仕上柱
國彭城郡開國侯食邑一千三百戶食實封四
百戶贈刑部侍郎朱公行狀

曾祖起皇唐大理司直

祖泌皇唐夏州安撫判官檢校比部員外郎
父祿光皇唐江陵府當陽縣尉累贈戶部郎
中

潭州衡山縣紫蓋鄉雲峯朱昂字舉之年八
十三

公世京兆涇陂人唐天復末烈考避地穰中梁太祖革
命與唐舊臣顏充李濤等數十家南趨衡嶽下每冬至

歲旦必序立于南嶽司天祠前北望號慟日月昏曠天地悽慘殆二十年淪喪垂盡唯李濤一族北歸公以家世儒業與進士熊若谷鄧洵美力學有朱遵度好讀書人謂之大萬卷謂公為小萬卷時中國多故四方幅裂躬侍老母急於祿養嘗與友婿張憚間行路出廬陵遇道士謂之曰非久中原當有真主混一天下公仕至四品安用南為遂北遊江淮遇周世宗南征招討使韓公令坤至揚州公杖策軍門告以治亂方畧韓公器之使

知永真縣事兵革之際逋逃過半公便宜綏輯歸者七千餘家韓公表授永真令秩滿南歸太祖皇帝即位故相國李公昉以給事中出使湖外物色異人公與東平呂夔入謁傳舍李公延見甚喜尤加賞識譔南征錄云朱呂二君甚可語道泊李公就知衡州奏公為錄事參軍秩滿調授襄州宜城令尋除太子洗馬知蓬州又就知廣安軍時渠州妖賊李仙聚衆踰萬劫掠軍界公設策擒之果台渝涪四州之民連結為妖者一切不問實

人遂安時宰相薛公居正謂公有斷而識體遷殿中丞
知泗州太宗嗣位江表初平李氏銜壁吳越獻地使駟
係道舟車蠶午共億餉饋倉卒畢給聚淮濱流屍三千
為冢瘞之有戍卒謀亂公止誅首惡悉貸枝黨人感其
惠淮南歲漕米三百萬石公督其程運左右漕事朝議
美之就遷監察御史充江南轉運副使職滿知鄂州未
幾加殿中侍御史充峽路轉運副使就遷庫部員外郎
充轉運使受代歸闕太宗問以夔峽邊事敷奏稱旨命

直祕閣面賜金紫時年六十有五在職二年以衰老求
郡出知復州宰相李公昉洎文館近職皆以詩送行到
郡暮歲上表乞致仕不允次年郊祀改元至道遷水部
郎中復乞致仕太宗謂宰臣朕知此人可召赴闕既至
再命直祕閣又二年兼越王府記室公雅正好禮王甚
憚之眞宗即大位越王封雍王公亦改雍府記室明年
遷司封郎中知制誥兼判史館時上以館閣舊書編簡
散墜命公同內臣皇城使勝州刺史劉承珪與判昭文

館集賢院完緝殘缺區分部類事畢上其目加吏部郎中職如故明年以本官充翰林學士周歲公年七十七矣歎曰少值亂離老遇清世被知獎顧邈疇列草枯木朽其將柰何遂抗表請老便殿召對敦諭再三志不可奪乃授工部侍郎致仕翌日命閤門祇候內殿崇班張士宗就第賜器幣舊制致仕官授訖放朝謝今刑部尚書薛公映時知制誥上特命映就公第召對從容獻納漏下數刻將退復曰卿閒居多暇無忘公家或有章疏

可附遞以聞又問以歸老之地公奏以嘗從事江陵有敝廬可以自蔽翌日命賜金俸公懇讓數四方允其請勅荆南官吏曰朕以朱昂素有儒學方居內庭拜章退身其志不奪授貳卿之秩表尚齒之恩斯為賢臣實可嘉獎仰本府候朱昂到日常切存問有表章附遞以聞仍詔公候秋涼戒路發日命兩制丞郎三館臣寮祖道於南薰門中使賜宴於玉津園冠蓋盈路供帳甚隆榮動中外光震都國明年開封府秋試進士遂以玉津園

宴送朱翰林歸渚宮為詩題為時所貴尚如此舊相張
公齊賢洎諸近臣有詩五十三章禮部尚書知開封府
溫公仲舒有長韻詩一章和者一十三人朝野榮之公
始至家病瘧復有詔撫問之曰卿閣筆鼇禁挂車渚宮
言歸當隆暑之時行邁有長途之役諒因勞止暫染微
疴沉卿自樂高年素知善攝宜加頤養以就痊平眷顧
之懷寢興無已疾愈但閉戶靜居不交塵雜專以讀書
養素為樂深達釋老之旨自稱退叟所居東偏有官隙

地數畝詔以賜公遂建二亭一曰知止一曰幽棲有仲
弟協時為主客郎中佩服金紫以書招之協亦請老來
歸時人榮之比漢二疏數年著資理論三卷凡六篇上
之論時政賞罰得失及言天下至廣尤須賢才以為治
具若限以常牒則英雋之士沈於下位上嘉之降詔獎
諭曰卿文學俱優踐歷斯久竭節已彰於躬行退身自
保於安寧猶勤愛戴之心以備討論之典頗資理道深
體純誠勉順休和宜知頤養其書仍付史館同州觀察

使李公士衡為荆湖北路轉運使以公所得卿相餞行
詩刻石於承天院今龍圖給事中陳堯咨守荆南日視
揭榜以公所居里為東西致仕坊景德四年公豫撰墓
誌月而不日以季夏二十三日捐館朝廷哀悼賻帛百
匹錢十萬米酒麪有差賜孫适同學究出身非常典也
門人私謚靖裕先生禮也先有廖圖者與弟凝姪融居
南嶽皆工詩有名于代世有家法公娶圖女封姑臧郡
君至次子正辭之升朝也贈太原郡太君公贈刑部侍

郎公善誨子弟博貫儒術男五人長正彞進士及第仕至光祿寺丞次正基今為殿中丞同判彭州次正紀今為潭州湘鄉令次正用今為左侍禁知欽州次正辭年十九進士及第今為太常博士江南西路提點刑獄勸農使賜緋魚袋姪頓進士及第今為司封員外郎知隨州正旬進士及第終江陵府監利縣主簿正臣進士及第仕至太常博士三司戶部判官諸孫用蔭見任殿中丞縣令主簿者五人女二人長適故左正言直史館兼

直祕閣夏侯嘉正次適今尚書右丞集賢院學士馮公
亮其積德至盛有如此者公操履方重志節清白歷官
四紀家無餘財淡於榮進深恥流競為太子洗馬十有
五年未嘗屑意在禁林非公事不至兩府所得之物取
三之一散購奇書躬自補綴是正文字及其退居有書
萬卷太宗皇帝之在位也製九絃琴七絃阮多士獻頌
第公首下詔褒美眞宗皇帝初授徽冊公奉制譔文辭
體深厚尤為大筆其餘述作甚多常鍾愛今太博以為

紹我家事者此子公沒後太博歷官皆有能聲孜孜為學編次公平生所著為三十卷今相國司空太原公序引冠篇見鏤版行於世夫紱冕在躬節表所以招累公歷事三朝訖無玷毀其清慎者也血氣既衰入朝所以忘返公懇辭近職甘於退伏其高尚者也死生之變智者怵焉公豫決大期順物之化其達生者也家庭之訓昔人難之公躬導諸子厥後甚大其善教者也舉是四節足為名臣恭叙遺芳敢告太史謹狀

贈太師中書令冀國王公行狀

公之先周王子晉之後世家太原唐末高祖諱遐隨曾祖冀公倅江西廉幕始占籍新喻祖鄭公生而警悟三歲冀公教誦書日數百言七歲遂熟五經偽吳順義初賜童子及第弱冠偽唐調偽授本縣尉屢宰劇邑陰布德惠專以寬刑利物為意諸郡累表為戎佐仕至常州都團練判官檢校水部郎中通判軍州事歸朝終于濠州團練判官父晉公幼有志節刻誦墳典江南明經登

科選限未選復舉五經與故龍圖閣學士刑部侍郎杜
公鎬同榜擢第特授本縣尉治有風迹秩滿而終初晉
公侍鄭公任鄂州通判日秦國夫人有娠就蓐之旦江
水暴溢將壞廨舍亟遷于黃鶴樓既夕生公或言漢陽
居人遙望樓際若有氣象公幼而秀異資性機敏六歲
丁秦國夫人之喪十二鍾晉公之戚哀瘠以禮有如成
人初秦國夫人疾啓鄭公曰此兒生時頗有異將大王
氏門戶願愛之鄭公視如子保育于魯國夫人教于家

庭不就外傳涉獵書傳詞筆早成鄭公之在冀幕也公甫十八太宗皇帝弔伐大鹵譔平晉賦論獻于行在而還鄭公益奇之待以賓禮鄭公移濠梁公應進士舉將拔覃懷解鄭公三止之曰吾年七十有三恐不逮汝之返也公既行踰時鄭公忽一夕沐浴易衣會家人置酒夜分疏記後事且曰吾歷官五十餘載慎刑罰活人多矣後有興者其在吾孫乎遽捨筆就枕而薨府中聞樂聲泠然公淳化三年第十一人擢第釋褐試祕書省校

書郎亳州防禦推官勵精吏職屬朝廷遣著作佐郎直
史館曾會中使李知信察近郡風俗吏民狀公政迹會
等上之有詔褒諭就遷防禦判官加文散十階尚書屯
田員外郎舒公薦公藝文可稱溫裕有素特改祕書郎
司市征于淝上眞宗即位就遷太常丞時大統初集急
于用人詔近臣舉轉運使副三司判官給事中喬公維
岳首以公應詔召赴闕主判三司憑由理欠司賜五品
服公抗疏請盡蠲宿逋用廣寬惠辭甚詳切上嘉納之

未幾命宰府召試孝為德本頌授右正言知制誥厯判大理寺審刑院賜服金紫三年權知貢舉召入翰林為學士時蜀寇始翦反仄未安朝廷切于綏集以公充西川安撫使寬宥枝黨蠲去逋租驛奏便宜大愜上旨趣遣使召還授左諫議大夫參知政事明年郊祀加給事中景德中契丹寇北鄙駕將幸澶淵特加工部侍郎判天雄軍兼兵馬都總管並參豫如故敵騎引退王師凱旋公以台席不協懇退時柄遷刑部侍郎上特置資政

殿學士員以處之有司定議班在翰林學士之下尋充
南郊鹵簿使禮訖撰鹵簿記上之改兵部侍郎充資政
殿大學士位在翰林承旨之上尋知承進銀臺司兼門
下封駁三年遷尚書左丞知樞密院事修國史明年瑞
命集於東闕改元大中祥符泰山父老請紀云岱公首
建大議將明上志遂以公充封禪制置禮儀使兼判兗
州禮畢加禮部尚書受詔撰社首壇頌加戶部尚書從
祀睢丘加吏部尚書並掌機密明年加檢校太傅充樞

密使同中書門下平章事有詔仍帶天官之秩九皇降
格加檢校太尉七年罷樞要以吏部尚書奉朝請再典
銀臺之務未幾復拜樞密使如故九年典校道書畢加
檢校太師尋兼羣牧制置使明年改元天禧上玉皇寶
冊禮畢加右僕射尋兼判禮儀院充會靈觀使亟遷左
僕射兼中書侍郎平章事監修國史明年充景靈宮使
都總管判祥源觀事三年授太子太保判杭州歲餘召
還復為資政殿大學士加司空尋制授山南道節度使

檢校太師中書門下平章事判河南府輿疾還第除司
農卿分司南都今上即位改祕書監分司如故旋起授
太常卿知濠州遷刑部尚書知江寧府天聖元年九月
詔還制授司空門下侍郎平章事充玉清昭應宮使昭
文館大學士監修國史真宗實錄畢加司徒二年郊祀
封冀國公三年冬十月兼譯經使赴上于傳法院歸第
感疾請告踰月詔使國醫相望于道十一月丙午聖駕
臨問賜白金五千兩戊申薨于東京永定坊第之正寢

遺命歸葬濠梁從祖塋也翌日皇太后車駕臨哭出涕
制贈太師中書令輟朝三日遣起居郎直史館修起居
注李仲容攝鴻臚卿護喪內侍省都知雅州防禦使韓
守英副之官給經費十二月乙卯上內殿成服哀榮之
禮近世無比公五子並先公而亡次子從益仕至贊善
大夫第三子慶之終于衛尉寺丞追賜進士及第女二
人長早亡次適大理評事張瓌故參知政事洎之嫡孫
也孫女一人適太子中舍陳執禮故尚書左丞恕之子

也外孫女一人男一人並幼遺奏之上嗣男將作監丞
寅亮詔授大理寺丞諸父比部員外郎判尚書刑部司
農寺仲微素負吏幹累更事任特授司勳員外郎餘戚
屬授官者九親信錄用者十五人夫人李氏世本名宗
允懷淑德累封崇國夫人公嘗言往歲曾行圃田宿村
舍夜起視天中有赤文成紫微二大字光耀奪目使蜀
還褒城路中遇異人視刺字乃唐相裴度晉公告公以
默定之語而隱公之貴也遂留心羽化之事凝神雲漢

之表多用道家科儀建壇場以禮神朱篆紫微二字陳
于醮所以餘俸脩晉公祠于圃田自撰文書石以紀其
事永定在御真蔭方隆謁欵神靈對越天地尊尚道德
布宣符瑞創圖訪對多自于公注意沃心無與為比若
乃頌祇睢壤奠壁瀨鄉圻恭謝之壇增耀魄之號公皆
為禮儀使法駕之展盛容也奉寶文以先道公繼為天
書禮儀副使同天書儀衛使路寢之尊景命也披帝錄
以肇宣公為讀天書禮儀使良金之範真儀也公為迎

奉聖像禮儀使溫王之勒乾文也公為天書同刻玉使
前後所賜手詔璽書無慮二百函奉和御製及御和賜
所進歌詩僅三百餘首初罷參庶務備問內殿特賜宸
章辭極褒賁西鎮洛師南撫澗水皆有睿作寵行榮冠
一時事超千古逢辰之盛理絕名言尤善筆劄勢甚峭
勁自成一家老而益壯好奕碁以自娛嘗奉詔撰集翊
聖保德真君傳三卷先天紀三十卷五嶽廣聞一百卷
與諸賢同撰集冊府元龜一千卷彤管懿範二百卷又

奉詔撰僖祖太祖太宗謚冊今上徽號冊文汾陰朝觀
壇頌西京應天禪院大原資聖禪院碑銘天書祥符贊
彤管儀範序廣孝泉崇真橋記冉耕封東平公贊皆為
大筆或藏祕館或行於世公出入兩府時將二紀敏于
見事詳于敷奏智術過人慎勤無及朝廷大議帷幄潛
慮或造膝以言或密封先達詭詞焚藁世莫得聞其茂
功懿績藏在盟府景行嘉猷播諸物聽謹次官閥敢告
良史謹狀

墓誌銘

故金紫光祿大夫檢校禮部尚書右神武衛大將軍致仕使持節康州諸軍事康州刺史充本州團練使上柱國開國伯食邑七百戶贈鎮南軍節度使太原王公墓誌銘

夫天人之際疇德以交神明之後因聖斯啟故在漢則太一下降著畫法於壽宮在唐則氣祖有言告鴻緒於仙李帝祚炎宗真蔭在天挺生異人潛達靈命清徽既

往故可得而紀焉公諱中正字平叔本名捷汀州長汀縣人也其先緱嶺疏源將兵者三代太原辨族世祿者四方累紫重金實繁於京洛分枝辨葉或播於甌閩禮讓傳家鄉閭觀法至公曾祖安卷道懷寶洒落塵迹與物無累越世自高迺後李氏據有江表急於聚兵王父靖以州里之豪屈致戎校偽置百里指揮使烈考成以事繼烈軍始終於偽置宣猛指揮使累贈左屯衛將軍然皆命不逢辰職非所好綽有繁祉茂啟後昆公資氣

淑均秉性淳質幼失怙恃旁無周親逮於成人勉率賈
用雜良以苦既不忍為欲羸惡器終非其樂以咸平初
祀憩星子故墟偶會羽人實姓趙氏一見如舊巨測於
靈契信宿後別徵有於緒言迨及其冬再遇茅嶺長房
奉酒雖未入於壺中君賢負笈遂同遊於江介繼市鉛
汞對成白金乃訪竒草於瀝陽辨靈液於廬岫五圖金
紀授以采掇之名九井玉橫傳以合和之要仍別付靈
方環劒緘滕之書戒曰非遇人君慎勿輕述寶誨方畢

煙駕俄隱公乃累詣京室求見無階還過上饒佯狂自
異坐抵常禁謫戍嶺南艱危之中顛沛之際保護所授
不敢少懈未幾靈游荐至慰其憂虞復取神劔緘書且
云當候異日時供奉官閤門祇候謝德權適總巡兵頗
聞異述及公私還轍下置對有司德權時方在朝奏請
免釋迺禮之私第鍊成樂銀上獻帝宸遂解軍籍德權
樂公之道歎待累年制伏之珍盡畀而無吝祕授之事
萬計而不言一夕潛歸追及於路靈眴幽啟睿聽有聞

始命景福使新州觀察勾當皇城司劉承珪案問之缺
甚隱惟堅請於面陳物色可知固潛與於心會承珪因
為改名中正俾詣登聞始得召見於龍圖閣下雲井之
瑞脩對於綺窓栢寢之言悉驗於金刻乃授許州散掾
畱止京師多與道人偶語於市承珪詰之乃曰即授法
聖師也王君既來遂容於請見金母將至亦有於傳言
遂以景德四年降皇城司解舍紗厨中戴冠佩劍服皆
青色玉文雲襦雖亞虛皇之尊紫羽華衣迥異上卿之

貴時承珪新堂方構靈御頻格金童列侍咸佩於印章
天官時來若校於名籍承珪竊聆旅語始知乃司命眞
君焉國家每欲究皇儀展帝容受乾文襲黃瑞公皆密
致眞誨有開必先所以薦玉欽柴祥兆咸報起圖溢牒
見象日昭泊夫登岱勒封昭姓紀氏刻日千里之外時
無纖塵陟降萬仞之上安若平地非元眞幽贊百神奉
塗則孰預於此粵以大中祥符三年加上聖號曰九天
司命天尊擢授公銀青光祿大夫神武軍將軍致仕乃

給全奉環列為重方比於鉤陳奉身甚高彌富於天爵
四年春獐牲雉上薦禮后皇金輝發於大河偉兆騰於
冀壤烏奕嘉應覺悟蒸黎乃授公本衛大將軍領高州
刺史賜勲上柱國加金紫光祿大夫階五年冬宮籥既
嚴夜漏將半彤霞采霧上屬慶霄芝蓋雲裝下臨祕殿
繇繇聖胄長發其祥翼翼帝心聿懷多福迺奉上號聖
祖上靈高道九天司命保生天尊大帝賜公爵平晉縣
開國男食邑四百戶七年春仁里肇裡嘉壇大報徽冊

登陞而密雪罷零法駕在郊而烈風遽息肝嚮之際昭
報甚明迺進公爵開國伯增邑三百戶俄以本官檢校
禮部尚書領本州刺史兼御史大夫會稽未還嘗承衣
繡之問遼東遠別甚慰華表之思八年以分刺之權兼
榮有日諸武之衛久次當遷遂改左武衛大將軍康州
團練使皆使任如故若乃國家舉增高之典以揚鴻徽
展頌祇之儀以答貺施薦混元之號以尊妙本侔曲密
之規以事上帝法太微之制以昭祖德肇五門之宇以

崇嶽鎮新六寢之位以壯宸居在展寢之初慶成之始
咸有靈命以藥金銀為公貢獻者累巨萬數輝彩絕異
不類世寶靈喻於方丈價倍於朱提豈止丹砂可成方
為食器太山所出遂鑄褱蹄然自高真之降格也崇奉
之際唯承珪預卒後玉清昭應宮資善堂都監崇儀使
入內內侍省押班周懷政以愼重齊明嗣掌其事皇城
司新堂遂改為元符觀及承珪私第曰東宅公之通濟
坊私第曰南宅皆碧輦停颺之地太霞頓轡之所瓊干

素羽藻衛常嚴玉籟雲鈞遺響相繼唯公得奉見給使
恭侍左右馬九年秋霜露纏憂龍蛇起嘆王人臨視太
醫承詔使者半道帝夢於來言玉館在庭公知其獨召
有加之際真誨復宣曰慎密類汝者少塑形於景靈宮
為吾輔勿憂初公居甘泉坊第徙居南宅疾亟遂還甘
泉坊以十月乙亥啟手足享年五十五上嗟悼久之命
懷政監護葬事贈鎮南軍節度使仍塑像於景靈宮天
興殿之左達巷之香顯十旬之異特予之客有雙鶴之

奇以十二月甲申寔於開封縣之汴陽鄉榘岡村娶渤海施氏累封吳興郡君以公昭贈加等特進封本郡夫人夫人生於景胄夙茂於閨風同穴之言嘗盟於皦日偕老之痛蓋極於帷堂子四人曰世寧世長世昌世融並任右班殿直學禮而立象賢以成既冠勝衣已聞於警悟作室肯構佇見於蕃昌女四人姆訓甚嚴淑德皆備奉嬪慶旅未聞鳴鳳之祥率禮公宮將奉采蘋之祭而皆靡瞻頻泣何怙銜哀孺慕無時柴毀過禮有後之

美豈曰誣哉公通簡有常慎默無比自肅祇眞睠傳致
靈心非覲至尊未嘗輕泄至於黃冶所就靡敢忘施貢
獻之餘則周濟貧乏崇奉僊釋時論善之哀哉隙駟難
畱藏舟易失青烏卜宅雖示於歸全太陰練形未知其
化去佳城既啓遠日有期慮宰木之將折懼芳猷之或
墜仰承中詔俾勒堅珉銘曰

靈王之穆世烈滋芳誓淮獻吉解佩歸祥奕葉彌繁異
人挺出性易言簡體放心逸仰緣靈契夙契元眞潛通

密命昭啟昌辰慶發祥流禮交樂舉三境開光百神合
序朱房七映密侍睟容丹經九籥潛侔化工官重訓齊
任隆環衛忽痛蘭摧盡疑蟬蛻將壇追寵仙館畱形重
原既卜幽隧爰局草茫茫兮風烈烈素驂斷兮哀筇絕
岸之曲兮水之陽露寒泣兮秋雲蒼緊夜臺兮叵測唯
令譽兮彌彰

欽定四庫全書

文莊集卷二十九

宋 夏竦 撰

墓誌銘

故保平軍節度使同中書門下平章事駙馬都尉贈中書令魏公墓誌銘

方國家東禪之七祀上朝景亳駐蹕睢陽肇為京都紀興王之壤永懷祖德思逮事之臣以忠武軍節度使駙馬都尉鉅鹿公親舊兼崇勲賢莫貳內出明制進位中

台赴上於鼎司接武於諸相進退體貌無與比焉越明年冬十月上齋居宣室勤卹萬區以全魏近藩朔垂右地邊圉之勢勝京師之屏翰士馬雄壯非元功不足以鎮重遂以公判天雄軍府事政治寬簡獄訟哀止吏民守闕請立石而紀頌嘉穀生境方便詔而旌美不幸起龍蛇之歎罹霜露之憂天禧元年正月國家奉有帝之冊薦尊祖之名祿塋廟祧升煙郊兆天子均聿懷之慶舉先親之典制授公保平軍節度使相國如故且詔赴

闕肩輿就第中使相望虛中日望其有瘳措紳方詠其
多福無何秋氣始至疾疹增劇載紆詔蹕慰以聖言俾
加勉膳之勤尚期勿藥之喜仍賜白金三百斤天不憖
遺福善則虛七月甲子以不起聞上撫几震悼臨哭出
涕書忠甲令彌念於良臣畫像雲臺方追於英烈嗚呼
哀哉真命世之賢佐生人之間傑也公諱咸信字國寶
其先大名獻兆屯固流祥西漢肇高平之封東晉啟劇
陽之土冠冕奕世譜牒聯華公之遠祖始家汲郡唐失

天命祿去王室魯王父楚卷懷琛寶適世而長往累贈
太師兼侍中魏國公曾祖妣郭氏追封燕國太夫人王
父韜襲善以處躬含和而味道累贈中書令越國公祖
妣李氏追封晉國太夫人烈考仁溥仰承積德生蘊明
略往佐周命厥有大勲爰立鼎司兼崇樞府金印雙導
蓋極寵露之威火德應天首宣欣戴之力嘉謀懿範國
史詳焉公之受脤於藩登庸繼業屢奉明祀載洽鴻禧
有司累贈烈考尚書令追封秦王謚曰宣懿母李氏封

秦國太夫人繼母李氏追封韓國太夫人公韻宇沉邃
資質豐碩積懷衽之善教聳公侯之奇表話言詳雅動
止有度初補宣懿隨使都校建隆初起家授朝散大夫
右春坊太子通事舍人先是太祖啟運立極英武睿文
神德聖功至明大孝皇帝龍德在潛人望攸屬秦國太
夫人獲奉昭憲太后太后亦降秦國之第公在幼穉不
樂戲弄瞻視審諦有如成人太后奇之始議姻戚洎乾
德五年五月太宗至仁應道神功聖德文武睿烈大明

廣孝皇帝方尹京邑遣判官劉鼇至第語宣懿以昭憲雅意翌日召公於南宮延見誨諭久之八月復召公親引對於講武殿太祖謂曰知善弓馬命射四十餘發太祖嘉之命太宗賜酒食太宗且諭之云既精射御當留意文學公由是刻志墳索耽味圖傳五經十七代史尤其該總復得三式風角之妙後太祖頻召對命射常稱其善五年三月復召赴講武殿令帶御器械黨進欽等四人同射以較其能薄暮方罷未幾太宗再遣左右陳

信召公諭以選尚之意四月復召公於內中就食廳引對於萬歲殿賜襲衣玉帶闌裝鞍勒馬七月永慶公主出降特授檢校尚書右衛將軍兼御史大夫駙馬都尉賜安定里大第一區夏屋千餘間園館臺榭備馬仍分御溝水以灌池沼六年加檢校尚書左僕射吉州刺史太宗即位加檢校司空超授本州防禦使仍備環列之職太平興國元年并冠未賓賓庫再駕賜公白金三百觔以治裝公擢五屬之甲從六尺之輿左右不違晨夕

匪懈太宗既平大鹵直趨盧龍乘百勝之氣遂乘亡之
敵將幸山北盡埽區落公與駙馬都尉王承衍從容獻
諫太宗納之三年郊祀加檢校司徒四年加檢校太保
六年特詔常奉外月加給錢十萬七年授鎮州觀察使
雍熙三年以獫鬻犯邊王師薄伐朝廷旰食冀方繹騷
太宗分命懿親藩屏近甸廼以王承衍鎮大名駙馬都
尉石守信守河陽而澶淵要區喉咽之地慎擇能臣無
易公者遂命公往撫之賜白金五千兩是年冬公以河

水湍悍舊隄回曲備禦告勞科率為患迺徑鑿新渠二十里以直水勢繇是十餘年間無衍溢之患端拱元年朝廷挖青壇修黛邦將籍千畝而郡界河水清徹見底味如甘醴迺盛以銀缶因公主上之中外稱賀禮畢超授彰德軍節度使尋詔兼本州馬步軍都總管淳化元年正月驛召歸闕公主改封齊國九月澶州河大決壞城壁斷浮梁墊居民阻邊奏物價踊貴太宗召公於崇政殿諭以方略令馳傳而往面賜白金萬兩今上時為

壽王賜宴於含芳園公下車之日撫疲瘵賑乏絕境內
以安先是朝廷命內殿崇班閻承翰修復河橋比公視
事久之功猶未集太宗令健行親事官日賫詔書催督
公與謀之而承翰執誼以為方冬聚凌如山水勢涌急
難為施力遽入奏乞俟來春公既餞承翰迴鳩集諸工
自乘小舸截巨浪排層冰紼纜造舟是日亟就乃遣健
步上狀承翰方入對陳難成之勢而公奏繼至太祖大
悅顧謂入內侍省都知李神福曰朕選魏某果能集

事翌日公主入賀太宗復嘉歎有晉武孟津之賞密賜
珠玉金寶時都大提點河堤崇儀使劉永恭大庀役徒
修築隄塞盛寒皸瘃人皆苦之公列上其事乞至春初
太宗遣健步賫詔自京一日而至亟命罷役五年春將
修長堤當役夫二萬公自保程其工省去大半太宗令
高班內品李信宣旨命公圖上減工在所尋降詔依之
時境內田隄水退皆填淤加肥而民漂陷之餘耕無首
種相聚愁歎坐待流亡公奏貸麥數萬斛是夏大稔民

樂輸還官緡屬不絕由是人皆處業貧者更富又以州
獄久繫逋欠官物又保任之民資產已竭追償無出公
將上言並詔蠲免今上即位加定國軍節度使公主封
許國長公主咸平二年八月講武於東郊詔充在京新
舊城內都巡檢十月郊裡充舊城內巡檢十一月以控
弦入寇邊城晏開革輅將行羽書狎至命公充貝冀路
行營都總管初無辨嚴時方鎮各控重兵以自衛公至
天雄軍始得步騎二千以隨勁敵之壘煙火相望公左

實右偽虛振軍聲倍道兼行直抵邊郡敵亦憚公威名
辟易而退尋命公男昭亮傳詔召赴行在景德元年上
親握武節北守澶淵公扈從星陳以及凱入二年郊祀
加武成軍節度復以西充奧區舊俗豪悍乃命公知曹
州先是廣濟渠兩岸積水居田千頃民用匱乏莫輸其
租公乃度其地宜置水門導之入河人獲其利州下先
多為盜逆旅之舍皆日暮扃戶賃宿者巾屨難保至公
之治也民不敢欺無夜吠之警上朝陵輦洛詔從車與

四年曹南耆壽列奏借留朝議方以三城右地股肱劇
郡經瀆所控屯兵甚多遂輟公鎮河陽民吏望風畏憚
刑罰罕用大中祥符元年密命開先珍圖洊降上讓德
云岱歸功祖禰公屢陪近輔夙侍嚴祠禮畢加檢校太
尉二年敵使至闕宴豆屢頒上知公善弧矢命公伴射
賜予加等所以旌絕藝而威遠人也三年禋祭睢壤合
答后祇西巡之路頗遙北門之寄尤重乃命公知澶州
兼駐泊馬步軍都總管提舉澶濮齊鄆等州德清軍寇

盜公事賜銀綬大劍各十上幸瑞聖園射弓命內侍宣
旨卿每苦臂痛今日之宴不可辭也公奔馳赴召射中
銀缶上親解之賜鬘裝鞍勒馬非常典也四年禮畢就
加忠武軍節度復召歸闕爾後真輿昭格鉅典交修寵
命便蕃禮數尊異以至開公府正台極歲給公用絳錢
加至七百萬任兼文武寵冠勲戚竇固之久居大位每
被訪於邊事杜預之既立戰功唯耽思於文籍洎出臨
魏郡也豪右屏迹囹圄屢空雅歌投壺有儒者之樂輕

表緩帶得名將之體洎染疾歸第恩禮勤渥殫太醫之妙伎極內府之良藥命也不淑奄歸窀穸享年六十九詔廢朝三日贈中書令命內侍省部知蠻州刺史竇神寶營葬事太常博士秘閣校理李垂攝太鴻臚監護太常考行定謚發引之日有司具一品鹵簿鼓吹太常博士秘閣校理慎鏞遣奠於順天門以十一月丁酉葬于河南府洛陽縣賢相鄉勲德里從先塋禮也公一歷東朝一踐環衛八臨藩服五換旌旄累階至開府儀同三

司策勲上柱國進爵為公食邑至一萬三千九百戶真
食四千七百戶加凌煙之號為推忠保節同德守正翊
戴功臣祿位寵榮並極人爵若乃自刺史陟防秋由廉
車正節鉞皆靡限官序度越等夷斯又國家急賢之恩
於是乎在也恭惟許國長公主太祖皇帝之第三女也
淑質純茂柔儀肅祇處約惟勤在貴能降唐襄城之禮
度為諸親之楷則漢平陽之慈愛享累世之崇重先公
十九年而薨嘗獻瑞牡丹一叢花皆千葉色潤殊絕太

祖命以一枝著金壺中盛以玉盤令待詔黃居寀圖之以賜公主至今存焉男三人長昭易任內園使頃持使節遠聘穹廬中塗感疾先公而沒次昭亮今任東上閣門使恩州團練使器宇不羣識度殊遠太宗以其與王承衍男世隆皆嫡外孫特愛之幼歲召入並賜坐以昭亮好學命吟賞花詩立成特賜緡錢御酒命共游於後苑初未名太宗一日御筆書二名賜之曰從訓昭亮令擇名焉起家授如京使自是每令昭亮押賜公加恩綸

告兩聚貴族繼賜白金萬兩以充六禮之用洎公正位
國相出臨魏郡昭亮往賜生辰禮物賀席方半而驛置
俄至特降綸綍授昭亮恩州團練使仍兼上閣之職聞
者榮之然而昭亮生於貴戚雅好儒術妙達時務詳練
舊章受詔同定闔門儀制廣溢甚多箕裘之業蕃昌慶
大人皆望之次昭侃今任內殿承制風度清粹操履溫
重夙稟誼方蔚為德器女二人長壽縣主率禮公宮式
瞻貴里副笄之日太宗賜白金飾肩輿重七百兩亦以

嫡孫特恩非常例也適內殿崇班閣門祇候張士宗早
亡次女蕙問夙聞薨華易落適右班殿直闔門祇候王
從益而逝孫一人東頭供奉官餘慶學稟詩書德茂蘭
玉孫女二人長適故左領軍衛將軍致仕趙保勲男宗
爽次在室皆從訓保阿照言圖史蓋宣懿之積德累仁
公之常善齊物厥後繁衍奕葉隆昌者焉及公之薨也
朝廷追錄大勲誕推延賞授昭亮四方館使團練如故
昭侃遷禮賓副使姪殿中丞昭慶遷國子博士左侍禁

昭用遷西頭供奉官贊善大夫昭文遷殿中丞左侍禁
昭素及孫餘慶並授閣門祇候初遺奏之上也昭亮以
事非禮制獨不列名又慮國恩均被遂上封預辭乞居
喪制恩旨允之斯又忠孝之訓有後之美也如是公資
性方嚴秉心純一至誠待物正色在公其出奉民政也
決事明敏嫉惡如讎彊暴讐服冤滯畢達所至之人
皆愛之是以歷事三朝寵眷日隆太祖日於輦洛道中
命御龍官以金盤盛含桃賜於馬上太宗嘗因寒食日

遣內侍岑保正賜御筆令召王承衍等習射於家園并
賜銀缶腥餼等後公鎮澶淵太宗射於後苑翌日以御
射中銀缶命公主賜公令書於家信曰朕昨日賞花射
弓甚思卿故有是賜其恩寵尤異也如此然公雖幼享
崇貴深承顧待而每鑒前代之戒小心兢慎過自修抑
故出入五十餘載終始無玷加以忠厚之節發於天性
一物之異不敢家藏太祖幸洛公以園第宏敞奉表獻
之又世有芙蓉丹砂一枚重將一鎰以承隙日則室中

皆明後令壽光縣主以服餌法獻於太宗旋降御筆褒之賜黃金器五百兩近歲國家新宮闕之制令昭亮懇奏願納奉入以助經費上優詔不允論者美之又仲兄太僕少卿某之疾也自澶淵乞赴闕侍疾及其有加也上章乞授少卿長子昭度一官尋授太常寺太祝其弟悌皆此類也每好夜坐召兒姪輩諭以君子立身之道雅合經典之意自感疾至薨氣魄不衰精識自若人皆以為修德之報焉佳城既卜遠日有期諸子以某備列

西臺久塵吏職稔聞世德嘗奉緒言見索斐辭以識嶽烈讓不獲已謹為之銘銘曰

炎正啟運帝賚忠賢九功並建百度勤宣下寧海域仰清岳象教化之重倚之國相內撫方嶽外清邊塵軍旅之要付之將臣允顯魏公位兼文武槐鼎登庸節旄分土左右王室事上以忠股肱右地待下以公廩聖之心念功惟舊白水攀龍湛恩克懋惇叙之典立愛惟親秦臺降鳳寵睠斯勤佐國承家謂之世德閱閱之勲載於

金石安人去患謂之民政藩屏之治播於謠詠密謀潛
慮莫際其涯獻贊帷幄惟聖用嘉高風遠度莫闕其奧
儀表紳冕惟賢是徵哀哉良相百福宜全嗚呼彼蒼何
奪之年桃李臨喪密章加秩帝極哀悼禮贈優恤寒風
慄兮愁雲暮鹵簿陳兮班劍布卷組帳弓空煙儼靈輶
兮戒路哀笳咽兮楚挽悲邛之麓兮洛之湄從先王兮
魂不昧掩幽窆兮夜何其有旂常兮今名不朽有琬琰
兮英威可久繫似續之良賢兮永蕃昌於厥後

故守司徒兼門下侍郎同中書門下平章事充
玉清昭應宮使昭文館大學士監修國史冀國

公贈太師中書令謚文穆王公墓誌銘

并序奉
教撰

天聖三祀歲次星紀黃鍾布序丙午建辰皇帝御琯輿
詔金蹕出景龍門幸永定坊北第視大丞相冀公之疾
賜白金五千兩戊申丞相薨于位享年六十有四兩宮
震悼皇太后車駕臨哭盡哀天子素服三日不視朝以
太子中書令告第大小歛遣尚宮弔祠法賻加等有司

謚曰文穆命左史攝鴻臚卿副內侍太監送喪官給經
費具本品鹵簿以明年仲春之壬申歸全於濠州鍾離
縣廣德鄉西原之祖塋有詔侍臣書其徽烈公諱欽若
字定國其先緱山遠系潁陽茂緒武岡睢陵之材啟國
於晉永寧清源之德胙土於唐本居太原世為鬲族高
祖諱遂以巢寇之亂避地江楚喜玉筍之岑寂惟厥田
之沃衍始家宜春之新喻遂生遐仕至江南西道鹽鐵
巡官遐生郁幼而警悟不樂嬉戲徧誦五經偽吳童子

擢第釋褐本縣尉諸郡累表為戎佐視秩臺郎闕決郡
務歸朝為懷冀濠三州判官郁生仲華夙有志尚刻誦
墳索為唐明經中選又以五經登科復尉本縣時議榮
之公即濠州府君之孫新喻府君之子及公之貴三代
皆贈太師尚書令兼中書令曾門封冀祖廟封鄭禰室
封晉皆為國公恭惟鄭公當五代紛競仕偽唐之僭據
轉側江介間關世路而能治尚清約志在平反愛慈孫
以字升卿高門閭以容駟馬克祚厥後何其盛歟公聰

識早成性資強敏六歲喪母十二而孤鄭公愛之保育
於祖妣魯國太夫人教于家庭不就外傳道藝兼該辭
筆瞻逸弱冠初拔進士解淳化中策高第試吏芸局從
事譙幕加倅職再毗戎務被舉遷秘書郎典闕市于泚
上升朝為太常丞理通欠於計司以右正言歷掌內外
書命授左諫議大夫再遷工部侍郎并叅大政以刑部
侍郎充資政殿學士改兵部充大學士繇尚書左丞三
轉至吏部尚書皆知樞密院自檢校太傅再加至檢校

太師行尚書右僕射並使東樞實兼宰職俄以左揆兼
中書侍郎監修國史對掌魁柄以太子太保判餘抗歸
朝再為資政大學士尋拜司空未幾視秩維師兼榮鉉
府節制襄岷居守伊洛興疾還第左遷司農卿改秘書
監並分務南都起授太常卿典濠州轉刑部尚書知江
寧府召還復序正司再升中書兼門下侍郎充昭文館
大學士實首台席遂作司徒乃封冀壤勲階爵邑名數
咸極初永定在御憲章大備以駟牧之重領于樞臣公

嘗為羣牧制置使肇玉清昭應宮以事有帝崇景靈宮
以奉真祖營會靈觀以禮岳鎮並建職局綜於兩府公
繼為三宮觀使惟公事三朝相二帝嘉猷亮節深圖遠
筭秘諸信史此不獲書若夫建隆以還萬國上計辟名
既辨斷盜未償領于司存列之辭案人生有訖吏責無
窮公抗疏切陳援救蠲弛深達國體克稱上仁注意之
求實自于此咸平初寇劇緣間搖亂益部偏師致討剗
削厲階武臣尚威傷斬過當餘孽亡命反仄靡遑公往

宣使指悉貫枝黨處置機事彼方遂寧召參台衡刻印
以待景德始邊城晏開羽檄四馳烽火相照公感憤激節
慷慨請行并護將臣克全魏壁洎乎元符候日奉高望
幸三事優游而未決禮官希濶而難講公首抗大義先
置喬岳芝英醴泉之品喬雲叶氣之祥圖素寫形使驛
言狀旁午亭傳覺悟黔黎比其昭昭者也若乃尊事神
祇專精齋祭寅威妙本校正真科交集上儀莫匪嘉慮
是以再長樞軸三陟正司中外迭居左右更踐體貌無

比論議必從寵冠一時年踰二紀至若黷牲雕壤徐鑒
曲里登魄寶之號熙報況之壇奉貞像於琳宮宣寶文
於路寢宮繼掌禮儀並持使印又若明禋歲事珍符先
道聿嚴容典奉以金輿公三職儀衛殊庭考閣常籙是
藏內出丹書勒於瑤簡公同司刻玉並兼置使之重益
為希代之榮祥符之間天下大治制有破觚之易法有
漏魚之寬太和陶蒸善氣回襲雲物絢色羽毛絳質百
嘉茂育萬瑞畢臻天子好文挺睿辭以昭紹惟公順美

著嘉頌以游揚前後賜御製屬和并御和賜歌詩僅三百篇若夫八幹庶績出撫近封鋪陳密議條對急政所受詔荅將二百函又奉命纂集翊聖保德真君傳三卷撰進先天紀三十卷五嶽廣聞一百卷鹵簿記三卷與諸儒同集冊府元龜一千卷彤管懿範二百卷又封祀既畢歸尊宗廟承詔撰僖祖太祖太宗謚冊神聖纂服初受鴻名奉制撰今上徽號冊文及前後被旨撰社首壇汾陰朝覲壇頌西京應天禪院太原資聖院碑銘天

書祥瑞西祀瑞贊彤管懿範序廣孝泉崇真橋記冉耕
封東平公贊博雅多文盡在茲矣公嘗言初晉公侍鄭
公之任武昌也公母秦國夫人有娠江水壞廨舍徙居
黃鶴樓既夕而生公或言漢口居人遙望樓際若有氣
象然公居景毫行視圃田幕宿村廬夜分偶起見天中
有赤文成紫微字使蜀言旋次褒成驛有客為謁具唐
相晉國裴公之名告公以默定之期而隱公嘗朱篆所
見文字及因鄂守增飾黃鶴樓又以俸錢修圃田晉公

祠為文書石以紀之常練氣於朝霞期脫屣于塵世姚
顓承白衣之報子房慕赤松之游參實于斯諒不誣矣
雅好奕碁善于筆劄樂醇旨之飲喜清商之樂第有北
園疊石為陂甘果美木蔭庇其下退食休澣於焉游息
晚年親歷艱難頗厭富貴延問高釋留心真際遂兼譯
經使二府柄臣送上於傳法院梵卿薦香大官具食歸
第感疾請告累旬侍醫盈門詔使係道錫萬金之良藥
殫九折之妙伎天乎不弔命將柰何輟相興謠見於斯

矣夫人李氏山河象德圖史時憲哀深惟殯痛極終天
送往盡哀庇親惟睦累封崇許二國夫人有子五人皆
先公而亡內次子從益仕至贊善大夫第三子慶之終
于衛尉寺丞追賜進士及第女二人長早亡次適故叅
知政事張公洎之嫡孫秘書省校書郎瓌孫女一人適
故尚書左丞陳公恕之子大禮寺丞執禮並懿行美材
大宗良配外孫男元壽女壽姐並幼遺奏之上也二宮
哀軫錄舊念勲並加常制嗣男將作監丞寅亮授大理

寺丞瓌遷大理評事充秘閣校理執禮改太子中舍又以公叔父仲微剖竹列成累書吏課握蘭建禮實綜虞衡兼秋曹之覆刑主大農之平糴特除司勳員外郎充淮南提點刑獄勸農使自餘戚屬授官親信叙用者二十有四人嗚呼高朗令終寵靈顯赫會元公之殯送文恭之喪極人臣之盛公以臣嘗豫寮舊屢刊史牒爰有治命請誌幽礎仰奉宸旨不獲固辭謹作銘曰

兵政宥密機軸穹崇惟公再踐昭事功兮將鉞在庭相

印垂組惟公保釐兼文武兮洪鑪造物威柄御人惟公
三八秉國均兮龍章在躬庭槐表位惟公經邦極名器
兮帝師尊異內樞隆顯祿以印章豐贈典兮乘輿縞素
笳吹悲鳴送以纁玉盡哀榮兮

故順容邵氏墓誌銘

大中祥符九年春二月甲午順容邵氏薨于京師太和
宮本院之正寢越三月壬子葬于開封縣清遠鄉繁臺
村奉先資福禪院之東北原嗚呼哀哉順容諱昭明廣

陵人也生稟嘉慶賦質柔和泳漢方江動謠於南國規
圖照史秘景於華宗先聖在潛懿藩初建金房入侍實
首於庶姬璿室沉英嘗悲于外館洎攀鱗上漢列職司
衣奉謁襲之宜辨采章之品肇封近郡寔啟博陵爰以
燕寢獻功女侍更直佩環異等禮序多儀迺進號於小
君實並長於九御被之紫服昭以寵章矧屬草輅弔民
躬平大鹵宸旒耀武出撫魏都束帶從行羽書狎至罄
宣懿立以及凱旋繇是賜塗金之裳陞榮于太監闢冀

國之壤列位於尚宮肅奉曾闡總司衆職嚴亮篇於局
禁謹琮璽于緘滕法式並修出納惟允暨夫白雲厭代
蒼震承桃改榮波之邑封奉壽宮之象設西陵極望莫
從于神遊中禁言旋復司於舊物逮珍符錫瑞之紀號
喬岳上封之明年超踐宮正之資載䟽安陸之國翼宣
忠訓糾肅羣居閑練典章詳明啟奏下推耆重之德上
嘉該總之能遂開張楚之封特拜司宮之命寔創斯號
以旌厥勞然而進退有常終始一志含華凝曜久冠於

小星積德累勤繼充於彤史上肇崇位置尊獎老成寵
以絳袍列於嬪職翟鈞九等班亞三妃感泣帝宸賜予
加數承顏似幄進見異儀宮掖之榮近代無比旋以憂
勞成疹年德寢高深惻上仁遷居別館勉膳之使承詔
之醫自冬涉春相望於道嗚呼收華麗日喪淑泉局常
珍之期不及者二歲嚮用之福咸備于一時黼帳悼懷
椒塗頌賄佳城既卜幽隧將封爰詔左言圖徽沉碧銘
曰

瑤臺降芬甘棠遺慶德茂材淑性資淵令參華六列盡
瘁兩朝閑練儀範勤勞夙宵徽序方隆餘年奄謝結戀
昌期銜哀長夜圖形藥館卜宅金園飾終之典永貴重
原

皇姪康州團練使夫人呂氏墓誌銘

夫人呂氏故丞相贈司徒正惠公之女正惠公之貴也
曾祖袞贈中書令祖琦贈太師尚書令其先太岳迷職
仰悟靈心尚父表海下因舊俗景祐垂世積德在人門

生忠賢亦啟明淑夫人夙稟家訓幼勤女職動則申禮
保阿是咨烝而獻功紘紼悉備言念詩史之意步中珩
璜之節加以文繡設色必窮其麗哀箏度次尤盡其音
國家璿源熾昌仙緒蕃衍選建明德廣封連城棣萼相
依犬牙錯峙上隆惇叙之化下嘉信厚之風扶植基幹
畢侯支庶崇右戚之惠盡家人之愛至若宗子授室王
姬下嫁必選令族以納多祥楚王親則帝兄位極人爵
寶玉分器芝蘭在庭其第四子天水郡公允誠生稟粹

和早聞詩禮懷金上序結綬內朝號為宗英特茂宸寵
始娶贈邠州觀察使潘惟正女不幸早亡宗臣上言禮
當繼室上乃念正惠之昔佐先帝厥有大勞當綴衣之
辰受傳聖之命寢丘之封雖遠高門之慶未移乃詔申
以婚姻寵其閥閭枚卜獻吉踰八世之祥大璋納禮豐
六版之數夫人遂以大中祥符五年夏六月乙丑召見
漢幄進對堯門象服暉華拜賜于中禁油輶擁從言旋
於舊居觀者榮之忠臣知勸越明年秋七月辛亥歸于

郡公六珈盛飾百兩親迎僕御授綬傳姆加景華燭光
焰煌煌如晝從者畢袵祁祁若雲有司相儀太官供具
婚姻之禮特盛於茲洎五月中叅三月廟見象掃居手
寶翟在衣動止肅雍詞氣舒婉式瞻貴里為憲宗家若
乃薦且公侯之宮胖載舊姑之室匪難之勤儆戒惟絲
之求善匹蘋藻之意柔潔山河之體容潤固已極圖傳
之言豈止率輦褓之訓者哉方將下司封之詔舉從夫
之典啟湯沐之邑增車服之數而薜華易落隙駒難駐

德宮永逝雖大化之攸同碩人無子痛芳音之莫繼嗚呼哀哉以七年秋九月壬寅終於內寢享年十九尚宮賜祔輟朝二日權厝於奉先資福禪院以天禧元年八月己酉葬于河南府永安縣南訾鄉漫流村潘夫人墓之西北原從吉卜也詔左騏驎使澄州刺史入內侍省都知張景宗營葬事以著作郎直集賢院徐奭攝大鴻臚監護歛封有日執紼將行乃命史臣圖芳幽礎銘

曰

降神靈緒賜履遙源間生邦媛選儷宗賢顧史永箴披
圖問禮德盛年闕華繁實委梁臺遣奠兮組帳煙空文
園安宅兮松路塵封哀蘭儀之永閔唯玉譽之無窮

文莊集卷二十九